

《北方毘沙門天王隨軍護法真言》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 21, No. 1248

No. 1248

北方毘沙門天王隨軍護法真言

特進試鴻臚卿大興善寺三藏沙門大廣智不空別行翻譯不入正經

曩謨囉多曩(二合)多羅(二合)多夜耶阿馱佉路步多囉(二合)耶地舍耶(二)吠室囉(二合)摩拏野(三)摩賀囉惹野(四)藥迦灑(二合)地婆多婆(五上)娑都哆娑娑室囉跛囉(二合)娑賀娜耶呬(賢二反)摩馱吒吒(去呼)尾跛囉(二合)灑夜迷跛娜也(二合)他保麗儻儻儻儻俱沙吠室羅摩拏野摩賀囉惹耶綺(佉闕反)婆(去)馱伽儻多囉摩熾都麼麼(某甲受持)捺娑(上)娑馱耶娑那謨婆誡嚩帝悉殿都麼多囉跛馱儻娑娑(二合)賀

若行者受持此呪者。先須畫像。於彩色中並不得和膠。於白氈上畫一毘沙門神。七寶莊嚴衣甲。左手執戟稍。右手托腰上。其神脚下作二夜叉鬼。身並作黑色。其毘沙門面。作甚可畏形惡眼視一切鬼神勢。其塔奉釋迦牟尼佛。教汝若領天兵守界擁護國土。何護吾法。即擁遣第三子那吒捧行莫離其側。汝眼毒惡恐損眾生。爾時行者。若誦此呪時。就好地。勿使有穢惡之處。極令淨潔取牛糞塗地。即以香泥塗之。散種種花燒香供養。行者上下衣服。並須清淨一上廁一洗浴。白月十五日夜。起首對像前。誦呪滿十萬遍訖。然後更取香泥復塗壇上。更取上妙好花散壇中。設種種飲食。行者取薰陸香一百八顆。各呪一遍散著火中。爾時毘沙門即現其身。行者若見神時取上好食飲。供養毘沙門神通。行者心中所願其神悉見。若行者不見神時。即虛空中有聲云。汝但存心持誦。一切事汝欲者悉如意。若不見神及不聞聲。但有大風。或雲遍滿布其壇上。其法即成就。若無上件等相。行者誦呪七遍。縛得入者其法即成。更勿懷疑

又法若行者欲得喝囉闍愛敬者。取赤小豆一顆呪一遍。投火中燒。如是滿一百八遍。其喝囉闍即遣人喚來極忽

又法若欲得大官人愛敬者。取白芥子一顆。一呪投火中燒滿一百八遍。其官即自來敬仰大喜

又法於白月十五日作壇。於像前作八肘。牛糞塗地了。取香泥重塗了。以五色畫作三重院。其壇內於中畫一大輪。四角拔折羅十字安之。第二院內。東面畫作一火珠光焰火出。南面畫三股。又西面畫一龍口中並出蓮華。北面畫一大繆。第三院中東面更畫師子。南面畫龍王。西面畫孔雀王鳥。北面畫羅刹手拄棒立地。壇四角各安香水瓶。內著雜菓楊枝。呪師洗浴著新淨衣。於像前設種種飲食供養。即誦呪取呵梨勒一顆。一呪一遍投火中燒之。滿一百八遍。從今已後。每日送一銖金與呪師永無乏少。

若得此物即須用盡。不得留著

又法呪蘇蜜及菓子。一百八遍火中燒之。一切諸天皆大歡喜擁護呪師

又法若欲遠行時。呪穀木柱行一切難處。悉得無怖。又法若惡人相惱亂者。心中想此呪神形。復舉心誦呪。未滿一遍。其人即不能動

若欲好者。心放中相便得解脫

又法若欲令怨家不同住者。取苦練子一百八顆。一呪投火中。其人即自遠去

又法若呪胡麻一百八遍。散著火中。一切人盡來供養呪師

又法若呪白芥子一百八遍散山中。一切惡獸不能傷人。其狩見人即自伏地不敢傷害。過去已後方即起去

又法若欲乞雨時。取杏子一百八顆都呪三七遍。著有龍水中必得雨下。欲止雨時。取梧桐子火中燒之即止

又法若行者欲乞食。先呪鉢一百八遍。隨所到處。自然而得一切飲食了。飲食殘者當時自化去。若須飲食時。至心向鉢者誦呪一遍。其鉢依還如故

又法若欲見功能天者。一日一夜不食。於佛前燒蘇合香。呪白花一百八遍。以散神前。其功能天即自現身。隨意所須一切願滿。所求財寶即得稱意

若欲辟除一切鬼神。呪白芥子及蘇。呪一顆一遍。投火中燒之即得

若有官人。於三寶中起不善心者。惱亂佛弟子者。欲令起慈心。須作降伏。呪手三十一遍。遙打之其人即著疾。欲好者慈心誦一遍即差

又法呪土二十一遍。散自身上。一切人見無不敬仰。欲令自身有威光者。呪墨塗額上。一切人見者無不愛仰。呪灰二十一遍。塗其身大眾中一切人見皆福德相。眾人供養。欲得遠涉道路不被惡人惡狩傷害。行加奔馬。呪左手大母指作印。而去欲得於鏡看事。呪童子童女問吉凶。其人即自下語。令道所病鬼姓名。即知是何等之病

若被蠱毒食者。呪所食物二十一遍。其所為毒即吐出

若患鬼病呪五色線。一遍一結一百八遍了。繫頭上或頂上臂上。一切病患除差

若患心病。呪石榴花汁飲之即愈

若欲攝狐魅病。呪五色線。令童子合成索。一呪一結一百八遍。繫項下。復呪楊枝打病者即立愈

若患骨節楚病。呪宥刀禁其病即愈

若欲護身。呪白芥子二十一遍。若灰若水亦然。散四方為界

若頭病或身病呪蘇烏麻油二十一遍。摩塗其身即愈

若患耳風呪蘇二十一遍食之愈

若患眼。呪杏仁油塗之立愈

若患腫。呪石榴黃一百八遍塗上即愈。或白檀香亦得

若患頭病。呪大黃二十一遍。塗額上即愈

若患時氣病。呪青木香末二十一遍。和水服之立愈

若患惡瘡疥癬者。取利蘆末和油塗上立即除愈

若患癩病。呪楊枝二十一遍令打病人即時除愈

若被蝎螫。呪乾脯火中燒之。熱拄其上便即除愈

若被蛇咬。呪畢鉢二十一遍。塗之當下即愈

若婦人乳腫。呪油麻嚼塗上即差

若帶下病者。呪丁香水服之即愈

若人卒被鬼著狂言荒語。呪水令服之

若患心病。呪黃土塗之

若患一切鬼魅者。呪石榴枝一百八遍。用打病者即愈

若欲得成就三事者。當於像前作壇。壇內散種種名花。設種種飲食訖。取赤銅針一枚。雄黃三兩細搗和蜜水為丸置像前。取荷葉覆上。以手掩之呪不息。當有相現。若烟出時取塗身上。即成安怛陀那。若火出時。手取火焰用塗面上。一切眾生見此人者皆大歡喜敬仰有大威光。所出言教人皆信受恭敬隨順。若有煖氣其人即取塗身即得無盡

又法於舍利塔前呪牛黃。依前藥法皆得塗身一切福德盡集其身。所在眾生見如羅闍無異

又法若知山間有孔似阿修羅窟者。當呪白芥子和自身血。一呪一遍打山間孔。盡一千八遍。其山窟自開。其阿修羅女身如火然。持諸香花迎呪師來。行者入此窟內。壽命一大劫身力還如阿修羅。亦如金剛無能損者。若欲出時亦得一切阿修羅女隨從。若不還時亦到火終無所害

又法將此像向舍利塔前。香塗地香花散於壇內。上妙供養了。取梨木作合子。取安膳那石為末。用秦膠水為丸。盛於合子中置壇中。行者著新淨衣。在於像前一日不食。誦此呪一千八遍了。亦無勞三相現。呪一千八遍訖塗眼竟。即塗脚掌心中胸前兩膊上頂竟。至心合掌思身如虛空。無有身相作自想時。行者隱形日行千里。一切事業竝皆悉見

又法欲得伏外道入火中。取自身血魚血。瞋心誦此呪二十一遍。投火中即入火中。得一頃食間不燒其身

又法若欲降伏外道。手中結印。瞋心誦呪一百八遍。外道所作法悉破壞竝不成就

又法若欲降伏諸國兵賊眾者。當畫一像身卦紫磨真金甲。於淨室中燒眾名香乳頭薰陸香。諸色香花飲食供養。真心誦念天王真言十萬遍。天王領天兵來助。他國兵敵自退散。若能晝夜誦念不絕。天王使太子獨健。領天兵千人衛護不離其側。所求如意應念隨心。皆得成就

